



Inatsisartut aalajangiiffigisassaattut siunnersuut Naalakkersuisut peqquneqarnissaat pillugu sulissutigeqqullugu erngup nukinganik iluaquteqarluni nukissiorfiliornissaq Qasigiannuanut aamma Aasiannut pilersuisussamik, aamma Nuup erngup nukinganik iluaquteqarluni pilersorneqarnerata annertusineqarnissaanik, maleruagassat siunnersuutip aallaqqaataani tunngavilersuutitut nalunaarsorneqartut naapertorlugit aqqissuunneqartussamik (Immikkoortut A-miit D-mut) (Inuussutissarsiornermut Nukissiuuteqarnermut Ilisimatusarnermullu Naalakkersuisoq) (Siullermeerneqarnera)

Ukiuni kingullerni silap pissusia nunarsuarmi eqqartorneqaleruttoq. Ilisimatuut misissuineri amerlanerit takutippaat silap pissusianut iluaqutaasussamik CO₂-mik aniatitsinermik millisaasussamik aammalu – ingasaatilaarlugu – nunarsuarput ilisimasatsit piginnarnissaanut iluarsissutit tuaviuuttariaqarigut.

Silap pissusaanut iluaqutaasunik nunatsinni sammisani arlalinni siuarsimasumik iliuuseqartarsimavugut. Ullumikkummi nukimmik atuinerput erngup nukinganeerpoq, taamaalillutalu sammisamut siuttuunerput tanngassimaarutigisinnaavarput.

Demokraatini isumaqarpugut nukimmik atuinerput silap pissusianut iluaqutaasumik ingerlatinnassagipput, inuiaqatigiittullu tamaviaarluta silap pissusianut iluaqutaasunik iliuuseqartuarnissarput tapersorsorluinnarparput. Tamanna aamma nukissiuutini pilersuineri pissaaq.

Siunnersuummik matumuuna Inatsisartuni aaliangiutissuarput Naalakkersuisut Qasigiannuanik aamma Aasiannik pilersuineri erngup nukinganik nukissiorfiliortoqarnissaanik suliniuteqaqqullugit, kiisalu Nuummi erngup nukinganik nukissiorfiup allilerneqarnissaa. Demokraatini siunnersuut akuersaarparput.

Tusaatissatulli tiguarput Qasigiannuani aamma Aasianni erngup nukinganik pilersuineri nukissiorfiliorneq 200 mio. koruuninik sinneqartunik inuiaqatigiit aningaasarsiorneranut amigartoorfiussamat. Illuatungaani silap pissusianut avatagiisinullu iluanaarutaasorjuussalluni.

Nuummili pilersuinerup annertunerulersinnissaanut erngup nukinganik nukissiorfiup allilerneqarnissaa, inuiaqatigiit aningaasarsiorneranut 400 millioner koruuninik iluanaarutaassaaq, imaapporlu aamma silap pissusianut avatagiisinullu iliuuseq isumatsialaalluni.

Tamanna tunngavingalugu Demokraatini iluarisimaarparput iluarsartuullugu pilersaarusiit ataatsimoortinneqarnissaat, tamanna isumaqassamat Nuummi pilersaarusiit inuiaqatigiit aningaasarsiorneranut iluanaarutaasusaaq Qasigiannuani Aasiannilu amingartoorutissat



matusinnaammagit. Taamaalilluta avatagiisit minguitsut isumannaarsinnaanngussuagut, nunatsinnilu sumiiffinni amerlanerni silap pissusianut iluaqutaasunik iliuuseqarsinnaanngorluta.

Demokraatit tusaatissatut tiguaat siunnersuutip akuerineratigut Naalakkersuisut pilersuinermut erngup nukinganik nukissiorfiliornissamut aningaasalersornissaanut pilersaarummik siunnersuuteqassasut. Aningaasaliinissamut pisariaqartitsineq 3 milliarder koruuniunissaa naatsorsuutigineqarpoq. Aningaasarpassuupput, taamaammallu pingaaruteqarpoq aningaasaliinissamut periarfissaasut arlallit misissorneqarnissaat.

Tamatumuuna Demokraatit Naalakkersuisut kaammattorusuppai tamat tikillugit eqqarsaqqullugit taamaalilluta aningaasaliinissamut periarfissat pitsaanersaat nassaarisinnaanngussallugu, qilanaarivarpullu kingusinnerpaamik ukiup ataatsip ingerlanerani periarfissanik assigiinngitsunik nalilersugassatsinnik saqqummiussiffigineqarnissarput.

Demokraatit oqareernittuut siunnersuut akuersaarparput aappassaaniinginneranilu ataatsimiitaliamut suliarisassanngorlugu innersuupparput.